



**Sud Bosne i Hercegovine**  
**Суд Босне и Херцеговине**

---

Broj: S1 3 Iž 038381 20 Iž  
Sarajevo, 28.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Mirsade Džindo, kao predsjednika vijeća, Srete Crnjaka i Vesne Trifunović, kao članova vijeća, odlučujući o žalbi Fate Đozić, 7028 Sharon dr, 50322 Urbandale, Iowa, USA, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 28.10.2020. godine, donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine.

Žaliteljica je protiv navedene odluke blagovremeno izjavila žalbu zbog pogrešno utvrđenog činjeničnog stanja i pogrešne primjene materijalnih propisa. Navodi da joj je, kao državljaninu BiH, uskraćeno biračko pravo, odnosno pravo na upis u Centralni birački spisak za glasanje van BiH, iako je ispunila sve zakonske uslove za upis, i na vrijeme predala prijavu.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana iz razloga što žaliteljica nije upisana u Centralni birački spisak, niti je dostavila valjan

dokaz o prebivalištu (lična karta BiH ili potvrda o prebivalištu u BiH) da bi mogla biti upisana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz predmeta spisa utvrđeno je da je žaliteljica dana 05.08.2020. godine elektronskim putem podnijela prijavu za glasanje izvan BiH u kojoj je navela da se glasački materijal na njeno ime dostavi na adresu u USA, Iowa, 7028 Sharon dr, 50322 Urbandale, te je u prilogu dostavila fotokopiju pasoša BiH izdatog u diplomatsko-konzularnom predstavništvu BiH u Čikagu.

Odredbom člana 3.15 stav (1) Izbornog zakona BiH („Službeni glasnik BiH“, broj 23/01 do 31/16), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Nadalje, odredbom člana 1.4 Izbornog zakona BiH propisano je da državljanin BiH sa navršenih 18 godina života ima pravo da glasa i da bude biran, ali da bi ostvario svoje biračno pravo mora biti upisan u Centralni birački spisak, u skladu sa Izbornim zakonom BiH.

Iako je žaliteljica državljanka Bosne i Hercegovine, pošto nije dokazala da ima prijavljeno prebivalište na teritoriji BiH, a što se dokazuje ličnom kartom BiH ili potvrdom o prebivalištu u BiH koje žaliteljica nije dostavila, imenovana osnovano nije upisana u Centralni birački spisak od strane nadležnog organa, kako to propisuje odredba člana 3.13 u vezi sa članom 3.5 Izbornog zakona BiH, pa time nije ni ispunila osnovni uslov za ostvarivanje prava za glasanje van BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA  
S U D I J A

Mirsada Džindo